

9. maj 2016

Kalaallit Nunaanni inatsilerinermut kandidatinnngorniarfimmik pilersitsisoqarsinnaanera pillugu nassuiaammik kingusinnepaammik UPA2017-imi Inatsisartunut saqqummiunneqartussamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaatut siunnersuut.

(Inatsisartuni ilaasortaq Ineqi Nielsen, Siumut)

Inatsisartunut ilaasortap Ineqi Kielsennip Siumumeersup saqqummiussaannut soqutigintumut ima Siumumiit oqaaseqassaagut.

Siumup anguniarpaa nunatta naalagaaffinngornissaa, uagutsinnut tunngasutigut nammineerluta tamakkiisumik akisussaaffigilernissarput - avataaniit naalakkatut isigisunit oqartussaaffigineqarata. Nunap namminersulerusuttup toqqammavigisariaqagaanni pingaaruteqarluinnartumik inissisima-soq matumani siunnersuutigineqartumi tikinneqarpoq.

Ilinniartitaanikkut immitsinnut pilersorsinnaassutsitta isumatusaartumik siunnerfitsinnullu naaper-tuuttumik inerisaajuartariaqarnitsinnik Inatsisartunut ilaasortap Ineqi Kielsennip qaqitaa tunngassu-teqarpoq. Tassa siunnerfik nunallu inuisa amerlanerussuteqartut anguniagaat tigussaasutigut iliuu-seqarnikkut ilinniartitaanikkullu toqqammavissinneqartariaqarmat.

Nunap immineq inatsilerinikkut ilinniarfeqalernermini nunap inuiasalu oqaasii naleqartitaalu inat-sisinut nalinginnaasunut immikkut pingaartillugit inissaqartitsinissani periarfississavaa. Nunarsu-armioqataaneq ilaatigut isumaqarnartarpoq nunarsuarmi assigiileriarernerinnarmik malitseqartoq, akerlianilli nunarsuarmioqataanerup ammaraluttuinnarnerata assigiinngissutsitta ersarissaavigine-qartariaqarnerinik eqqaasittarpaatigut.

Namminerisatsinnik innatsilerituunngorniarfimmik pigisaqalerutta inatsisit inatsisinngorumaar-tussallu oqaatsitsinnik allaqqaarneqartarnissaat qularnaarsimaneqalissaaq, inatsisimmi sanaajupput nunap inui pillugit taakkulu atuisussaapput. Inuiaat namminersulerusuttut inatsisitik inatsisissatillu nunap oqaasii aallaavigalugit allaqqaarneqartarnissaat atuisussanut isumaqangaarput. Tamannalu

qularnaarsimaneqanngilaq ullumikkut inatsisilerituunik kalaallinik naammattunik peqannginnerput patsisigalugu.

Inatsisitta oqaatsit allat atorlugit allaqqaarneqarsimasarnerata oqaatsitsinnik atuilluni sukuiarneqarsinnaaneri tupinnanngitsumik atuisumut killeqartarpoq. Taannaannaanngilarlu, inuit pisinnaatitaaffii Nunatsinnissaaq atortinneqartup iluani eqqartuussiviit amerlanertigut suliat imaan-naanngitsut inuillu pineqartut immikkut mianerineqarluinnartariaqartut sullinneqarneri oqaatsit arlariit atorlugit nutserisulerluni ingerlanneqartartut qimakkiartornissaannut siunnerfeqarsinnaalissagatta.

Nunat allat qiviarutsigit aamma taamatorluinnaq namminersuleriartuaarnermini pisariaqartitsisimanerat uagutsitut issimavoq, taakkunanissaaq nunami namminerminni inatsilerituunngorniarfinnik pilersitsisoqartarsimavoq, soorlu nunami sanilerisatsinni Island-imi taamatut Inatsisilerituunngorniarfik 1906-imili pilersinneqartoq – Islandip namminiilivinnera ukiorpaalunnik sioqqullugu.

Siumumiit pissusissamisoortutut isigaarput nunami maani namminiileriartuinnartumi inatsisilerinermi sulinerup pitsanngorsarneqartuarnissaa aqutissiuuteqataaffigissallugu, taamaammat siunner-suut manna taperserlugu, Naalackersuisut aappaagu upernaakkut nassuiaammik saqqummiussa-qarnissaannik peqquneqarnissannik aalajangiiffigisassatut siunnersuut Siumumiit taaseqataaffigissavarput.

Vivian Motzfeldt

Siumut